

ex Lacu *Eaugh* se in Oceanum duplici ostio transfundit, Salmonibus totius Europæ longe fecundissimus, eo quod ut nonnulli existimant, sit omnium fluviorum limpidissimus, cuiusmodi aquis Salmones unice delectantur. Est & *Logia* flu. cuius meminit Ptolemæus, qui nunc *Lough Foile* paulo superius spatiolo ostio in mare prorumpit: & alii. Terra insuper immanibus Silvis umbrosa. *Darni* ultra Voluntios confederunt, ubi nunc *Claneboy*, *Rowte*, *Glymnes*, *Krine*, omnemque tractum maritimum usque ad *Loghfoyle* tenuerunt. *Claneboy* lingua Hibernica *Gens flava*, O-Nealorum fuit possessio, & nequissimi illius rebellis Ioannis O-Neali fato nota, qui inter pocula hic a Scoto-Hibernis ex Hebridibus fuit interfectus: post cuius obitum hunc agrum Gualtero *D'Euvenux* Essexiæ Comiti concessit Regina Elizabetha. *Rowte* sedes erat *Mac-Guillmorum*, non obscuræ in hac ora familiæ. *Glymnes*, id est, *Convallis*, ad Barones Bissetos quondam spectavit, qui cum Patricium Atholiæ Comitem ob privatas simultates sustulissent ex Scotia huc exulatum venerunt, ac suæ gentis familiam illustrem reliquerunt. Supra has *Glymnes*, ex adverso Insulæ quam Ptolemæus *Ricneam*, Angli *Rachynes* vocant, *Krine* sita est *O Cabani* regiuncula quam Banna interluit, & *Logia* nunc *Lough Foile*. Ad quod flumen non obscura supersunt nominis *Darniorum* vestigia in lacu *Der*. *Robogdii* supra Logiam locati omne Septemtrionale illud Hiberniæ littus tenuerunt, ubi *O'Dougherty*, obscurioris notæ Regulus multum valet. Inter hos *Rabogh* viculus Episcopalis antiqui *Robogdiorum* nominis expressa retinet vestigia, sed quodnam sit *Robogdium* promontorium, nisi sit *Faire Foreland*, plane se nescire inquit Cædenus. Ab hoc scopusolo tractu extrema reflectuntur littora per *Swilby* Lacus ostium, qui Ptolemæo *Argita* dici videtur. Vterius magis ad Occasum *Vennicni* egerunt in *Tirconell*, ubi *Mac Rynny Fayd*, *Mac Swyny Neioeth*, & *Mac Swyny Bannigh* plurimum possident. *Viduam* flumen quod nunc *Chrodagh*, & *Vennicni* Promontorium quod nunc *Rames head*, & *Boraum* promontorium, quod nunc *S. Helens head* inter hos statuit Ptolemæus. A Boreo promontorio unde retrahuntur in Meridiem littora, ubi nunc *O Donel*, *O Buil*, & *Mac Guir* magni nominis Reguli habitant, confederunt olim *Erdini*. Hic est *Erno* Lacus de quo in generali descriptione diximus, & alter xv ab hoc milliaribus ad Arctum distans, in quo Insula emineth, & in ea ad monasteriolum specus obversantium nescio quorum spectrorum terrore, & horrendis visis decantatus. Incolis hodie *Ellanvi Frugadory*: id est, Insula Purgatorii, & Patricii Purgatorium nominatur. Patricium enim Hibernorum Apostolum a Deo ardentissimis precibus impetrasse creduli affirmant, ut poenæ, & cruciatus qui impios post hanc vitam manent, ob oculos hic proponerentur, ut insita suis Hibernis peccata, & gentilium errores facilius extirparet. Cæterum cum *Reglis* hic locus in Patricii vita nominetur, *Regiam* alteram fuisse quam Ptolemæus memorat, existimat Camdenus, cui suffragatur apud Geographum situs. Præter hoc Patricii, etiam aliud in hac Insula Brendani Purgatorium fuisse perhibent. Hi sunt antiqui *Vltoniæ* Incolæ, quibus tandem permisti Scoti, hinc Scotorum nomen in Borealem Britanniam plagam transvexerunt. Archiepiscopus unus in *Vltonia*, qui sedem suam habet *Armachæ*. Hos habet Suffraganeos Episcopos, *Maeth* & *Deren*, *Arduch* forte *Apde*: *Kilmore*, *Clogher*: *Downe*, *Coner*: *Kloncknos*, *Raboo*, forte *Rapo*: *Dromore*. Regio hæc ut sine subactione inhorrescit, ita Incolarum ingenia sine humaniori cultura maxime efferantur.